

皇清經解

皇

清

經

解

皇清經解卷一千二百六十一

學海堂

爾雅義疏

棲霞郝戶部 懿行著

釋親第四

釋名云親視也言相隱視也說文云親至一切經音義九引蒼頡篇云親愛也近也然則親愛至

近無如父母故親始於父母禮記奔喪及問喪注並云親父母也公羊莊卅二年傳君親無將注亦云親謂父母是父母稱親之義也穀梁隱元年傳親親之道也詩云戚戚兄弟是兄弟稱親之義也郊特牲及哀公問並云親之也者親之也是夫婦稱親之義也左氏昭廿五年傳云為父子兄弟姊妹甥舅昏媾姻亞以象天明杜預注以六親為釋正義曰六親謂父子兄弟夫婦也此篇首宗族次母黨次妻黨次婚姻皆親屬也故總曰釋親

父為考母為妣

禮記曰生日父母妻从曰考妣嬪今世學者從之

考之彝訓如喪考妣公羊傳曰大傷厥考心事厥考厥長聰聽祖桓之母也蒼頡篇曰考妣延年書曰嬪于虞詩曰聿嬪于京周

禮有九嬪之官明此非外生之異稱矣其義猶今謂兄為舅妹為媼即是此例也

此釋父母之異稱也考者釋詁云成也妣者說文云歿母也曲禮云生日父曰母从日考曰妣鄭注考成也言其德行之

成也妣之言媿也媿於考也然則考妣者父母之異稱曲禮雖云存歿異號若通言之則生存亦稱考妣終歿亦稱父母故士喪禮云哀子某爲其父某甫筮宅又云卜葬其父某甫是終歿稱父母之例也方言云南楚瀑湍之間謂婦妣曰母姁婦稱婦考曰父姁郭注古者通以考妣爲生存之稱此注引蒼頡篇考妣延年是生存稱考妣之例也

父之考爲王父父之妣爲王母

加王者尊之也

王父之考爲曾祖王父

王父之妣爲曾祖王母

曾猶重也

曾祖王父之考爲高祖王父曾祖

王父之妣爲高祖王母

高者言最在上

此從父母推而上之至於高曾祖以親由父母起故還從父母稱之也釋名云父甫也始生已也母冒也含生已也是親由父母之義又云祖祚也祚物先也又謂之王父王祖也家中所歸睢也王母亦如之然則祖父母而曰王者王大也君也尊上之稱故王父母亦曰大父母也會者重也說文云曾益也與增同釋名云曾祖從下推上祖位轉增益也高者尊崇之稱釋名云高祖高皐也最在上皐韜諸下也曲禮云祭王父曰皇祖考王母曰皇祖妣變文言皇者鄭注更設尊號尊神異於人也皇君也然則皇王皆大君之稱其義亦同祭法又以曾祖王父爲皇考高祖王父爲顯考曲禮所言祭時

之尊號祭法所說廟制之殊稱皆非常義
所施至於存歿通稱則以爾雅為正焉

父之世父叔父為從祖祖父父之世母叔母為從祖母從祖而別

世統世有為嫡者父之舅弟先生為世父後生為叔父嗣世統故也

此又推言父之伯叔兄弟也釋名云父之世叔父母曰從祖
父母言從己親祖別而下也亦言隨從己祖以為名也檀弓

注云敬姜者康子從祖母魯語云公父文伯之母季康子之
從祖叔母也韋昭注祖父昆弟之妻也然則準是而言父之

世父當為從祖伯父父之叔父當為從祖叔父爾雅文畧魯
語則詳矣又言世父叔父者釋名云父之兄曰世父言為嫡

統繼世也又曰伯父伯把也把特家政也父之弟曰仲父仲
中也位在中也仲父之弟曰叔父叔少也叔父之弟曰季父

季癸也甲乙之次癸最在下季亦然也然則爾雅不言仲父
季父者亦畧之如從祖父之例世父叔父俱有父名者喪服

傳曰世父叔父何以期也與尊者一體也舅者說文云周人
謂兄曰舅玉篇省作舅爾雅又作舅釋文本亦作昆下同

男子先生為兄後生為弟男子謂女子先生為姊後生為妹父

之姊妹為姑

此釋兄弟姑姊妹之親也姑與世父叔父尊同而別言之者以與姊妹同類故也兄弟者釋名云兄荒也荒大也故青徐人謂兄爲荒也弟第也相次第而生也白虎通云兄者況也況父法也弟者悌也心順行篤也姊妹者女兄弟也異其稱者別之也釋名云姊積也猶日始出積時多而明也妹妹也猶日始入歷時少尚昧也白虎通云姊者恣也妹者未也按詩云遂及伯姊是女子亦謂女子先生爲姊爾雅畧舉一邊耳姑者釋名云父之姊妹曰姑姑故也言於己爲久故之人也詩泉水正義引孫炎曰姑之言古尊老之名也左氏襄十二年正義引樊光曰春秋傳云姑姊妹按襄廿一年傳有公姑姊列女傳有梁節姑姊妹然則古人謂父姊爲姑姊父妹爲姑妹今人省文故單稱姑爾雅不言者亦畧之

父之從父舅弟爲從祖父父之從祖舅弟爲族父族父之子相

謂爲族舅弟族舅弟之子相謂爲親同姓同姓之親兄之子弟

之子相謂爲從父舅弟從父而別

云父之從父舅弟者是卽父之世父叔父之子也當爲從父而言從祖父者言從祖而別也亦猶父之世父叔父爲從祖祖父之側也御覽五百一十三引作父之從父昆弟爲從伯叔按從伯叔古無此稱蓋誤耳喪服小功章亦云從祖父母

通典九十二引馬融云從祖祖父之子是父之從父昆弟也
云父之從祖兄弟者是即從祖父之子也族父亦當為族祖
父如下文族祖母之例御覽引亦作族父喪服云從祖昆弟
鄭注父之從父昆弟之子通典引馬融云謂曾祖孫也於己
為再從昆弟同出曾祖故言從祖昆弟總麻三月章云族父
母族昆弟通典引馬融云族父從祖昆弟之親也賈疏云族
父母者己之父從祖昆弟也族昆弟者己之三從兄弟也按
謂之族者白虎通云族者湊也聚也謂恩愛相流湊也云族
兄弟之子相謂為親同姓者是四從兄弟同出高祖者也大
傳云四世而總服之窮也又云絕族無移服鄭注族昆弟之
子不相為服是則所謂親同姓也賈子六術篇云六親始曰
父父有二子二子為昆弟昆弟又有子子從父而昆弟故為
從父昆弟從父昆弟又有子子從祖而昆弟故為從祖昆弟
從祖昆弟又有子子從曾祖而昆弟故為從曾祖昆弟從曾
祖昆弟又有子子為族兄弟備於六此之謂六親按此以從
曾祖昆弟當爾雅族兄弟以族兄弟當爾雅親同姓其義自
明矣云兄弟之子相謂為從父昆弟者此覆釋上文之
義也喪服大功章云從父昆弟鄭注世父叔父之子也

子之子為孫

孫猶後也

孫之子為曾孫

曾猶重也

曾孫之子為玄孫

玄者言親

屬微昧也

玄孫之子為來孫

言有往來之親

來孫之子為晁孫

晁後也汲冢竹書曰不啻

之舅 舅孫之子爲仍孫 仍亦重也 仍孫之子爲雲孫 言輕遠也

此釋子孫之異名也釋名云子寧也相生蕃寧也孫遜也遜遁在後生也按孫亦遠孫之通稱詩后稷之孫實維大王是也曾孫者釋名云義如曾祖也按曾孫又遠孫之通稱詩曾孫篤之鄭箋曾猶重也自孫之子而下事先祖皆稱曾孫孔疏引哀二年左傳云曾孫蒯聵敢告皇祖文王烈祖康叔是其義也子孫者釋名云子懸也上懸於高祖最在下也說文云子幽遠也來孫者釋名云此在無服之外其意疏遠呼之乃來也舅孫者釋名云昆貫也恩情轉遠以禮貫連之耳按舅孫亦遠孫之通稱左氏昭十六年傳云孔張君之昆孫據孔張是鄭穆公之曾孫今云昆孫則亦通名郭本釋言昆後是矣仍孫者釋名云以禮仍有之耳思意實遠也按此說仍字亦非郭訓重是也其義如曾孫矣仍孫或稱耳孫耳仍音相轉也雲孫者釋名云言去已遠如浮雲也

王父之姊妹爲王姑曾祖王父之姊妹爲曾祖王姑高祖王父之姊妹爲高祖王姑父之從父姊妹爲從祖姑父之從祖姊妹爲族祖姑

王姑者從王父而得尊稱也喪服總麻章謂之父之始是也會祖王姑高祖王姑其義竝同父之從父姊妹爲從祖姑其義與父之從父兄弟爲從祖父同父之從祖姊妹爲族祖姑其義與父之從祖兄弟爲族父同

父之從父兄弟之母爲從祖王母父之從祖兄弟之母爲族祖王母父之兄妻爲世母父之弟妻爲叔母父之從父兄弟之妻爲從祖母父之從祖兄弟之妻爲族祖母

父之從父兄弟之母者是卽父之世母叔母也上云從祖祖母此言從祖王母一耳父之從祖兄弟之母是卽族父之母也謂爲族祖王母卽族祖祖母也父之兄妻爲世母弟妻爲叔母者喪服傳云世母叔母何以亦期也以名服也大傳云服術有六三曰名鄭注名世母叔母之屬也按此二母亦稱伯母叔母故雜記云伯母叔母疏衰踊不絕地是也父之從父兄弟之妻爲從祖祖母者上云父之從祖兄弟之母也父之從祖兄弟之妻爲族祖母者上云父之從祖兄弟爲族父故其妻爲族祖母也本爲族祖母言祖者亦如從母言從祖母之例

父之從祖祖父爲族曾王父父之從祖祖母爲族曾王母

族曾王父母即己之從曾祖父母也喪服總麻三月章族曾祖父母鄭注曾祖昆弟之親也賈疏己之曾祖親兄弟也

父之妾為庶母

庶者眾也庶母猶言諸母也妾者釋名云接也以賤見接遇也庶撫也拾撫之也謂拾撫微賤待遇之也喪服總麻三月章云士為庶母傳曰何以總也以名服也大夫以上為庶母無服

祖王父也舅兄也

今江東人通言舅

此覆釋上文之義上云父之考為王父喪服謂之祖父母即王父母也舅兄已見釋言昆後也下

宗族

題上事也宋本此二字進在前非今從唐石經改正下俱放此謂之宗族者宗尊也主也族湊也聚

也然則凡父之黨為宗族不言父黨者母妻皆異姓故別稱黨父族同姓故總言宗族也

母之考為外王父母之妣為外王母母之王考為外曾王父母

之王妣為外曾王母

異姓故言外

言外者所以別於父族也外王父母喪服小功五月章云為外祖父母傳曰何以小功也以尊加也賈疏外親之服不過

總麻以祖是尊名故加至小功通典引馬融云母之父母也本服總以母所至尊加服小功故日以尊加按檀弓云或曰外祖母也故爲之服鄭注外祖母小功也然則外曾王父母禮不爲制服故畧之

母之舅弟爲舅母之從父舅弟爲從舅

舅者詩渭陽正義引孫炎曰舅之言舊尊長之稱喪服總麻三月章云舅傳曰何以總從服也鄭注從於母而服之按母之從父舅弟爲從舅此於禮無服開元禮謂之堂舅也

母之姊妹爲從母從母之男子爲從母舅弟其女子子爲從母

姊妹

從母者猶宗族之中有從父言從母而得尊稱也檀弓云從母之夫言從母有服其夫無服也喪服小功章云從母丈夫婦人報傳曰何以小功也以名加也外親之服皆總也按異姓服不過總以有母名故加重也然則舅與從母尊同而服異者以從母與母同類尤親故順母之心而加之也知者從母有母名舅無父名也云從母舅弟從母姊妹者以從母有母名故子亦有舅弟姊妹之名也喪服總麻三月章云從母昆弟傳曰何以總也以名服也左氏襄廿三年傳云穆姜之

姨子也杜預注穆姜姨母之子與穆姜為姨昆弟正義云據父言之謂之姨據子言之當謂之從母但子效父語亦呼為姨按釋名云母之姊妹曰姨傳言姨子知時已有姨母之稱緣父呼姨故子呼曰姨母雖不合爾雅及禮經之言時俗稱謂亦尚未巨失也後世踵之遂有姨兄弟姨姊妹之稱矣

母黨

亦題上事也黨猶所也以皆母所屬大傳云從服有屬從鄭注子為母之黨本爾雅為言也

妻之父為外甥妻之母為外姑

謂我甥者吾謂之甥然則亦宜呼壻為甥孟子曰帝館甥于貳

室是也

甥姑皆尊老之稱加外者別之也釋名云外甥外姑言妻從外來謂至己家為婦故反以此義稱之夫妻匹敵之義也坊記云壻親迎見於甥姑甥姑承子以授壻鄭注甥姑妻之父母也喪服總麻三月章云妻之父母傳曰何以總從服也鄭注從於妻而服之服問云有從重而輕為妻之父母鄭注妻齊衰而夫從總麻不降一等言非服差

姑之子為甥甥之子為甥妻之舅弟為甥姊妹之夫為甥

四人體敵

故更相為甥甥猶生也今人相呼蓋依此

此因妻黨而并及外親敵體者之稱也喪服總麻三月章云
始之子鄭注外兄弟也傳曰何以總報之也又云甥之子鄭
注內兄弟傳曰何以總從服也釋名云妻之舅弟曰外甥其
姊妹女也來歸已內為妻故其男為外姓之甥甥者生也他
姓子本生於外不得如其女來在已內也按妻之舅弟者婚
兄弟也姊妹之夫者姻兄弟也檀弓云申詳之哭言思鄭注
言思子游之子申詳妻之昆弟然則申詳為言思姊妹之夫
也有相哭之禮無相服之道故喪服篇無文此四甥字並生
之聲借據郭注及釋名知古來有此稱今所不行又按
左傳有騶甥甥甥養甥陰飴甥恐亦借甥為生所未詳

妻之姊妹同出為姨

同出謂俱已嫁
詩曰邢侯之姨

女子謂姊妹之夫為私

詩曰

譚公
維私

姨者左氏莊十年傳蔡侯曰吾姨也據蔡侯息侯同娶陳是
夫於妻之姊妹互相謂姨也釋名云妻之姊妹曰姨姨弟也
言與已妻相長弟也說文云妻之女弟同出為姨變姊妹為
女弟者蓋古之媵女取於姪娣姊為妻則娣為妾同事一夫
是謂同出詩碩人及左傳正義並引孫炎曰同出俱已嫁也
然則此有二義據詩左傳同出謂各自行嫁據說文釋名同
出謂共事一夫二義俱通詩及左氏於義為長私者釋名云
姊妹互相謂夫曰私言於其夫兄弟之中此人與已姊妹有

恩私也詩正義引孫炎曰私無正親之言按雜記云
吾子之外私某是私無正親凡有恩私皆得稱之

男子謂姊妹之子爲出

公羊傳曰
蓋甥出

女子謂舅弟之子爲姪

左傳
日姪

其從

謂出之子爲離孫謂姪之子爲歸孫女子子之子爲外孫

出者釋名云姊妹之子曰出出嫁於異姓而生之也郭引公
羊襄五年傳又云蓋欲立其出也又文十四年傳接蕃晉出
也纓且齊出也皆本爾雅何休注以出爲外孫誤矣姪者說
文云兄之女也釋名云姑謂兄弟之女爲姪姪迭也共行事
夫更迭進御也公羊成二年傳蕭同姪子者是皆以姪專指
女子子而言郭引左氏僖十五年傳姪其從姑姪謂子圉則
義得兼男子而言故喪服大功章云姪丈夫婦人報鄭注爲
姪男女服同是女子於舅弟之子男女均稱爲姪也謂出之
子爲離孫者離猶遠也釋名云言遠離已也按離孫亦曰彌
甥左氏哀廿三年傳以肥之得備彌甥杜預注彌遠也康子
父之甥氏故稱彌甥又謂之從孫甥哀廿五年傳太叔疾之
從孫甥也杜注姊妹之孫爲從孫甥與孫同列正義曰男子
謂兄弟之孫爲從孫故謂姊妹之孫爲從孫甥按今人省畧
從孫甥直曰孫甥矣謂姪之子爲歸孫者釋名云婦人謂嫁
日歸姪子列故其所生爲孫也鄭駁五經異義云婦人歸宗
女子雖適人字猶繫姓明不與父兄爲異族然則歸有二義

以服制推之鄭義為長喪服總麻三月早云父之姑鄭注歸孫為祖父之姊妹是其義也女子子之丁為外孫者與外甥外姑其義同也總麻三月章云外孫賈誼疏曰以女出外適而生故云外孫春秋僖五年經云杞伯姬死小朝其子何休注禮外孫初冠有朝外祖之道

女子同出謂先生為娣後生為娣

同出謂俱嫁事一夫公羊傳曰諸侯娶以一國二國往媵之

以姪娣從娣者何弟也此其義也

娣者姊也列女傳有魯公乘娣是子皮之姊娣娣聲近義同也娣者說文云女弟也易反歸以娣詩諸娣從之毛傳諸侯一取九女二國媵之諸娣眾妾也按娣娣即眾妾相謂之詞不關嫡夫人在內其嫡夫人則禮稱女君易云其君之袂不如其娣之袂良是其異也然則女子同出郭知謂俱嫁事一夫者左氏成十一年正義引孫炎云同出謂俱嫁事一夫也是郭所本方言云自家而出謂之嫁由女而出為嫁也正與此義合

女子謂兄之妻為嫂弟之妻為婦

猶今言新婦是也

嫂者說文云兄妻也釋名云嫂嫂也嫂老者稱也婦者說文云服也从女持帚灑掃也然則婦為卑服之稱嫂是尊老之

號其男子於兄弟之妻稱號亦同獨舉女子者從其類也嫂婦女子相爲服男子不相爲服以遠別也

長婦謂稚婦爲娣婦娣婦謂長婦爲姒婦或云姒婦今相呼先後

稚者幼禾也稚婦名以此然則幼者爲稚婦長者當爲植婦故釋名云青徐人謂長婦曰植長禾苗先生者曰植取名於此也是植稚對言此稚長對言者互相明也娣姒加婦者別於女子同出之稱也釋名云少婦謂長婦曰姒言其先來已所當法似也長婦謂少婦曰娣娣弟也已後來也或曰先後以來先後弟之也喪服小功章云娣姒婦報傳曰娣姒婦者弟長也以弟長解娣姒知娣是弟姒是長也鄭注娣姒婦者兄弟之妻相名也今按對文稱娣姒散文娣亦稱姒故左氏成十一年傳聲伯之母不聘穆姜曰吾不以妾爲姒據聲伯母是宣公弟叔肸之妻又昭廿八年傳長叔姒生男據叔向嫂謂叔向之妻是皆娣亦稱姒之例也賈逵鄭康成杜預竝云兄弟之妻相謂爲姒孔穎達於成十一年正義據左氏二文準諸爾雅以爲娣姒之名止言身之長稚不計夫之長幼於義亦通也娣姒猶言先後史記封禪書云先後宛若集解孟康曰兄弟妻相謂先後按亦言妯娌方言云築婣匹也郭注今關西兄弟婦相呼爲築婣廣雅云妯娌娣姒先後也然則妯娌先後竝娣姒之通名古今方俗語雖不同要皆爲匹敵之義左傳爾雅可互相證明耳

妻黨

婦稱夫之父曰舅稱夫之母曰姑姑舅在則曰君舅君姑沒則

曰先舅先姑

國語曰五言謂夫之先姑

謂夫之庶母爲少姑

舅姑者釋名云夫之父曰舅舅久也久老稱也夫之母曰姑亦言故也白虎通云稱夫之父母謂之舅姑何尊如父而非父者舅也親如母而非母者姑也魯語云古之嫁者不及舅姑謂之不幸夫婦學於舅姑者禮也君舅君姑者說文引漢律曰婦告威姑按古讀君如威威姑卽君姑也士昏禮云敢奠嘉菜于皇舅某子敢告于皇姑某氏鄭注皇君也然則君謂之皇者君皇同訓存歿異稱也先舅先姑者魯語公父文伯之母曰吾聞之先姑又曰吾聞之先子韋昭注先子先舅然則以先舅爲先子蓋從其夫稱也謂夫之庶母爲少姑者因夫有母名故婦有姑名也

夫之兄爲兄公

今俗呼兄鍾語之轉耳

夫之弟爲叔夫之姊爲女公夫之

女弟爲女妹

今謂之女妹是也

兄公者釋名云夫之兄曰公公君也君尊稱也俗間曰兄童章灼也章灼敬奉之也又曰兄公言是己所敬忌見之怔忡